

劉阮洞記

鄭志道

劉阮洞其傳久矣余竊邑于此訪於故老往往不知其所在比按圖得之以詢護國寺僧介豐乃曰洞居寺之東北二里斜行山谷隱於榛莽間人迹罕及景祐中先師明照大師嘗採藥見金橋跨水光彩眩目二女未笄戲於水上如劉阮所見此水仙之洞府也元祐二年春迺鑿山開道立亭於其上環亭夾道植桃數百本所以追遺跡續故事也越明年三月十日丁丑寺僧報桃花盛開并以其景物之盛求名焉余率縣尉縉雲郭儀彥文監征開封曹球得之來游而黃巖縣主簿西安王沔之彥楚與其弟宣德郎知金華縣事漢之彥昭繼至乃相與幅巾杖藜

道藏輯要

天下名山記
浙江劉阮鄭

全

軫集二

徜徉行歌沿澗而上觀綠波之漣漪聽寒音之潺湲微風過之餘音清遠飄飄然猶鏘佩環而朝玉闕也遂名之曰鳴玉澗澗之東有塢植桃數畦花光射日落英繽紛點綴芳草流紅縹緲隨水而下此昔人食桃輕舉之地也遂名之曰桃花塢自塢以北行數百步攢峯疊翠左右迴擁中有澗流隨山曲折而遊人之道從之及水窮而道盡則有罅清徹淵澄可鑿毛髮羣山倒影浮碧搖蕩中有洞門潛通山底其深不測雖淫霖瀑注而不盈大旱焦山而不涸此寺僧見金橋之地也遂名之曰金橋潭潭之南澗水淺見沙中有盤石三不沒者數寸可坐以飲自上流盃盤隨流蕩漾必經三石之間俯而撥之如在几案此羣仙

會飲之地也遂名之曰會仙石據石之端仰而視之三峰鼎峙峻及雲漢寒光襲人虛碧相映危崖蕩花紅雨散亂其東峰則孤危峭拔儀狀奇偉上有覆石如結鬢髻遂名之曰覆女峰其西峰則壁立千尋上連巨嶽朝陽方升先得清照遂名之曰迎陽峰其中峰則居中處焉以覆女迎陽爲之輔翼羣山之翠合而有之遂名之曰合翠峰三峰之間林麓疎廣草石瑰異左連瓊臺雙闕之山右接石橋合澗之水採芝茹木擷翠佩芳杖履輕而白雲隨笑語高而山谷應俯然而往直欲跨雙鳧御清風逍遙乎不死之鄉而不知塵境之卑蹙涉世之有累也遂名之曰迷仙塢自塢以出至於迎陽峰之下有石偃於山腹廣袤數丈寺僧因石址結亭于其上畫梅雕楹翬飛鳥革前臨清泚瓦影浮動魚躍圓波光弄樽俎浮杯之迹顧指在目遂名之曰浮杯亭是日也天氣清明東風和暢巖端過雨疎雲溜日余與諸君攜茵席挈壺觴上登崔嵬下弄清淺流觴藉草惟興所適山殺野斂具於臨時膾靈溪之鱗茹金庭之蕨無備具之勞也掛衣長松落帽幽石帶懶則披衣履倦則跣足解巾漉酒玉山自頽無衣冠之束也意所欲飲命樽注之一引而盡量窮則止無鐘鼓之節也酒酣浩歌聲振林木音無宮商惟意所發樵夫牧厮爲之捫高崖履危石荷柯倚策而視之彼烏知其非劉氏之子阮氏之孫厭洞府之未廣而復爲山間之游乎旣而夕陽西

道藏輯要

天下名山記
浙江劉阮鄭

畚

軫集二

傾暮烟四塞洞天之景恍若失之于是尋雲路騁歸驂松月照
人金影破碎遙聞雞犬乃悟人間諸君皆遽然而驚相顧而語
疑夫陵谷之更變而子孫之遷易也

道藏輯要

天下名山記
浙江劉阮鄭

金

三本

卷集二